


水道提綱

卷一至七



水道從新圖

卷一



水道提綱序

大地合水土爲體居天正中亦若人身然山其筋骨而水其脈絡也至靜者山靜中有動故爲幹爲枝以一而萬又以萬區界百川至動者水動中有靜故爲源爲委以萬而一又以一遍周六合陰陽自相經緯與日月星辰之麗天爲經緯者理氣協應此地道承天所以含萬物而化光也志地有書九邱尚矣治水莫神於大禹言地亦莫精於禹貢以治水先委後源則列敘九州疆域中高山大川自濱海之冀兗青徐

揚州西迄梁雍以山自有幹與枝水自有源與委則
總敘導山四列導水九川皆起雍梁而東至於海詩
言旣景乃岡相其陰陽觀其流泉古聖人體國經野
以建都邑利農田濟舟楫設津梁轉運阜財襟帶險
固孰有不於水深究其本末者乎自漢後地志日多
專言水者惟有水經及酈道元注道元於西北諸水
鉅細不遺可謂精矣後儒言水或解詩書春秋或釋
班志或於寰宇畧撮梗概或於郡邑各記方隅其志
存經濟者於治河防海水利守邊博考古今暢言得

失政理所係援引雖多不厭其繁雜若夫志在藝文情侈觀覽或於神怪荒唐遙續山海或於洞天梵宇揄揚仙佛或於遊踪偶及逞異眩奇形容文飾祇足供詞賦採用以爲美談從未有將中國所有巨瀆經流實在共聞共見可筏可舟不枯不涸如孟子所言原泉混混放乎四海者用水經遺意上法禹貢導川總其大凡芟除地志繁稱遠引分名別號附會穿鑿之陋務使源委了然展卷卽得此水道提綱所以紀載今日實有之脈絡山川都邑並用今名畧識古蹟

取其質不取其文如河經數徙濟惟入河漢有別支
江源非一黑水未知誰是積石原在羌中前賢早有
辯論無煩復贅取其實不取其虛也蓋自古帝王功
德之盛莫如我

朝重熙累洽治致昇平幅員之廣盡天所覆亦莫如我

朝臣召南學識愚淺自乾隆丙辰蒙

恩擢入翰林纂修一統志伏睹

聖祖御製輿圖東西爲地經度以占節氣後先南北爲地緯
度以測辰極高下漠北直過和林抵白哈海西番遙

窮拉藏至岡底斯凡金沙瀾滄潞江崑崙青海之近在邊陲黑龍盧朐松花嫩尼按出虎水烏蘇里江之本屬內地者源委秩如已迥非從前史志所能稍及而我

皇上聖神文武善繼善述

天威遐震克奏膚功踰流沙而開四鎮蕩平伊犁回部拓地至二萬里西域並入版圖濛汜咸受正朔此豈漢唐元明盛時賓貢享王所能較量濶狹乎哉卽古稱唐虞協和萬邦羲和所宅章亥所步伯益夷堅所志

方斯蔑矣臣初久在志館考校圖籍於直省外又專
輯外藩蒙古屬國諸部道里翔實是以志成之後亦
嘗條其水道惟圖無可據者闕之及蒙

恩告歸台山杜門無事養病餘暇時檢篋中舊藁次第編

錄共成二十八卷臣思爲萬國朝宗者君爲萬川會

同者海也以一水論發源爲綱其納受支流爲目以
羣水論巨瀆爲綱餘皆爲目如統域中以論則會歸
有極惟海實爲綱中之綱凡巨瀆能兼支流注海者
亦目中有綱綱中有目耳是以詮列次第不依水經

冠以海水自北而南并取禹貢首冀次兗之意內自
盛京鴨綠江口以西而南而西南至合浦外自雲南而
西而北又自漠北阿爾太山肯忒山而東至海又自
海而南而西而北包朝鮮至遼陽域中萬川綱目畢
列至於葱嶺以西水入西海印度水入南海丁零黠
戛斯以北水入北海前史或畧記其地以我

朝之聲名洋溢凡有血氣莫不尊親則重譯慕思盡爲疆

索占測經緯合寰瀛以成圖

臣

固可執筆俟也禹貢

曰聲教訖于四海說者謂極言之未可徵實然則自

生民以來久道化成一統無外能實有其盛超越前古其惟我

大清也歟

乾隆辛巳孟春原任禮部右侍郎臣齊召南謹序

序

通天地人之謂儒自漢以後號爲通儒者可屈指數
通儒而有著述傳於千百世者尤尠自宋迄元如
鄭夾漈馬貴與真西山王浚儀諸公其表表者也明
之楊用修唐荊川王弇州鄭端簡徒以繁富炫奇其
於古人有閒矣我

朝文治之盛遠軼往代名儒輩出如顧亭林黃黎洲萬
季野閻百詩諸先生俱足方駕古人予生也晚不獲
師承前哲而所親接而熟悉者則惟天台齊息園先

生先生著述甚夥而其最大者則水道提綱一書閒
嘗面叩所以作是書之由蓋在一統志纂修時同館
前輩楊農先王次山兩先生相與議論謂天文地理
之書愈久愈詳惟水道未有全書酈道元水經注徵
引雖博雅而踈漏踳駁亦復不免於今而欲成一大
書非君莫屬次山先生之座主也承命旬日構就海
之一則兩前輩斂衽歎服積十餘年反覆攷訂而後
出全書以示人窮流汭源支分派別展卷披閱朗若
列眉洵乎其爲通天地人之大儒而其書亦千百世

不朽之書卽起夾漈貴與西山浚儀諸公於今日亦
當閣筆推服無疑也一統志總裁宗伯溧陽任公凡
勘定諸纂修分輯書俱委之先生同時總裁一鉅公
素負盛名傲狠不相下一日忽踵門舉外藩蒙古屬
國書再拜屬之先生蓋東海徐尚書原稿所未備而
檔冊譯語多不可曉文人學士所未載筆無可依據
先生廼按

內府圖籍獨勦爲之其圖縱橫數丈列之中庭地上扶
服諦審默識會通此他人所五色目迷者而先生一

覽無遺亦可見其天姿絕異之一端矣先生爲人沖懷善下恂恂若訥與予交好三十餘年每談論竟日未嘗不望洋而歎也衰老餘齡竊喜得見是書之梓行而瀛三東瞻兩戴君表章師業有古人之風尤可嘉也故爲之述其緣起如此若以云序則吾豈敢且是書之必傳亦何待於序哉

乾隆丙申孟秋同學年弟淮南阮學濬拜纂

水道提綱序

通志言地理以水爲主水者地之脈絡也水道明而凡邦國都鄙之星羅繡錯者因以別焉夾漈以州縣之設有時而更山川之形千古不易故禹貢以山川定疆界北南以緯之西東以經之然後三條四列可指諸掌後之史家主於州縣州縣或沿革不一而水道愈亦多岐朱子亦云禹言子決九川距四海濬畎澮距川治水大旨在此數語蓋水以海爲歸墟四瀆百谷條目勢如其他匯而爲澤流而成川積而成浸或合或分或原或委欲求巨細畢賅委輸

貫澈提綱其要哉古之明於水道者莫如桑欽酈道元顧其書爲後人所紊經注相溷經諸儒悉心探索而蹠盤尚多有待釐正猶漢書傳外國輾轉舛訛不免眯目總由作史者未嘗身履其地依稀紀載未能如我

朝之版圖式廓中外一家得以按籍而求其實也天台齊息園先生以大雅宏達之才紬金匱石渠之祕曩在一統志館纂水道提綱二十八卷晚歲養痾山中凡歷代河渠溝洫域中水志地圖益加考覈卽塞北漠南流沙瀚海前此定伊犁平回部拓地所至諸水絕無經流可紀必按地

勢而詳著其綱無異聚米畫沙簡而能周博而有要其援據尤慎凡書之稍涉荒邈者汰弗錄且郡縣之名悉從

皇輿表以本朝所定爲斷使讀者展卷瞭然而瀦防宣洩之法黍稌粟麥之宜轉運飛輓之利胥於此得其槩焉視方輿紀要及錐指金鑑諸書其有裨世用略相等昔唐一行以爲天下山河之象存乎兩戒自三危積石負終南地絡之陰東及太華踰河並雷首砥柱王屋太行北抵常山之右乃東循塞垣至濊貊朝鮮是謂北紀南戒自岷山嶓冢負地絡之陽東及太華連商山熊耳外方桐柏自上洛